

SOURNETTOS.

PER

J.-A. RECLUZ



1855

LA BOUNABANTURO.

(2 juillet 1854.)

Certain gascou qu'abio de pourrituro
Amb'un coumpairé al fait de soun mestier,
Adréchoment, dedins tout soun quartier,
S'èro fach un rénoun per la bounabanturo.
Et millou que dégus al libre de naturo,
Légissio d'un cadun lou présent, l'abéni,
Del passat, atabé, bous fasio coumbéni:
 La caouso èro séguro!
 Ne pourrez pas douta
 S'anas lou counsulta,
 Disio nostre coumpairé;
Mais n'es pas coumplasent, cal fa milo fayçous,
 Coumo un corps sant lou prèga d'aginous;
 Et s'y boulès coumplairé
Aoumens, pas ges d'argent! car n'aourias un répous,
 Et damo Béritat restario dins soun pous.
 Tant souloment à sous pès et sans riré,
 Bou li cal fa: Moussu, bous prègui de me dire
 Tout ço qu'ay fach et tout ço que faray,
Despey que soy nascut et tant que yeou biouray.
 Se cal pas que préga, seray pas la darnieyro
 Respond uno chambrieyro,
Curiouso que noun say de couneyssé soun sort.

Touto fillo es curiouso
 Surtout s'es amourouso;
 Per fait d'acos yeou crési qu'a pas tort;
 Fossés ou serian à sa plaço,
 Mais laissen-la parla d'abord.
 — Se boulés me serbi, dis la paouro fillasso,
 Ségu lou prégarai aqui pla de boun cor!
 — Boli pla, li respond coumpaire lou finor,
 Ténez pla per hasard, l'abez aqui que passo....
 Bou lou boou arresta:
 Se bous fa la grimaço,
 Qu'agé l'air de fougi, de pas bous escouta,
 Prégas, prégas toujours, aourés sa bouno graço;
 Mais s'intrabés dins moun oustal,
 Yéou crési que l'aourias de millou toundre atal.
 Adoun nostro chambrieyro
 Que y èro familieyro,
 Lay intro sans fayçous (y a pas aqui de mal)
 Leou nostre debignairé
 Y séguis soun coumpairé;
 A sa dupo que tén
 Fa cent difficultach, s'en fa préga lountèn,
 Per fa bale la drogo
 Qu'y dono tant de bogo;
 Bers la fi ben pus dous.
 Quand couney que lou tento,
 La chambrieyro impatiento
 De saoupre ço que n'es, se met bite à ginous,
 Per un sinne que casso
 Foulech et diaploutous
 Coumenço à débita la fourmulo de graço,
 A peino es à la fi qu'y dis, lourdo bestiasso,
 Lèbo-te, toun destin es clar coumo lou jour:
 As cagat en naïssen et cagaras toujours;
 Et bou la planto aquis en riguent sus sa faço.
 Mouquette, Dious ou sap, de talos beritach,
 La chambrieyro rougis; mais gnaoura d'atrapach!
 De sa bounabanturo
 Elo se banto pas; mais leou bou la courduro
 D'un fial de fantasié
 Qu'enjaoulet talement las fillos del quartier,
 Qué la mêmo sémano,
 Marietto, Madéloun, Roso, Babé, la Jano
 Qu'à sa tasso oou bégut, graços à soun caquet
 Sus soun sort atabé tenguèrou soun paquet.

TALLEYRAND PÉRIGORD

ET

LOU GRAND NAPOULÉOUN.

(18 juillet 1854.)

La fourtuno d'abord s'èro tant alassado
 De baysa lou pati de nostro grando armado
 Qu'abio tant de renoun

Despey Napouléoun
 Qu'y l'abio clabélado
 Aqui coumo pel frount,
 Que soun caprici y bey un espèço d'affrount;
 Et d'uno himou pignastro
 Bou li deben mayrastros;
 Talament qu'à la fi lou sort lou trahiguet,
 Et sus un roc affrous la mort lou culiguet...
 El qu'abio fach trembla lous maistrés de la terro
 Que li fasioou la cour de pouou de soun tounerro!...
 Mais ses toumbat n'es que de trahisou;
 Erou quatre costre un, et toujours soun canou,
 Al grat de soun génio,
 D'aquestes pelucars sounabo l'agounio!...
 Atabé quand toumbet, el toumbet amb'hounou!
 Per remaousa 'n paouquet soun oumbro courroussado,
 Yeou me cal bous counta coumo un certain dimas,
 Lou grand home empourtat per soun amo indignado,
 Bous counfirmet un trayté ambe un bel gaoutimas.

Un gu de défrouquat, un home abouminaplé,
 Talleyrand Perigord qu'èro lou pet del diaplé,
 A logo d'ajuda soun mestré impérial,
 Lou bendet à l'Anglés qu'adoun nous boulio mal!
 Toujours impénétraplé,
 Degus per lou sounda se sentissio capaplé!
 Ero tant routinat, que, sans ges d'embarras,
 Ambé un mot fort adrech, un rire barrabas
 De l'emboul se tirabo,
 Et lous pus fis laysabo
 Ambé soun pan de nas.
 Sabio nada surtout, amay garda la fardo,
 Et quand gnabio d'espès, combiabo de coucardo
 Per saouta lou fangas.
 Ambé fosso toupet, certain jour, lou gusas!
 Bourguet jouga soun rollé
 Sus un item que fasio crida tollé,
 Mais se bey, per lou cop, mes de l'escalo en bas.
 Nostre Napouléoun que couneyssio lous homés,
 Sabio se lous caousi per fa 'ntendré sous pronés,
 Ou sous coumandaménts
 As Empèrurs, as Reys que bibioou de soun tens.
 Raroment se troumpabo
 Quand atal lous paoupabo;
 Tabé del défroucat
 Couneys leou lou talant d'estré pas 'scaoucélat;
 Et per sa poulitiquo,
 Sans crento bou l'arrèt, may souguesso tarat,
 Car ges d'embassadou li fasio pas la niquo!
 Trop leou un jour benguet; un jour pla rigourous,
 Pey que nostre drapéou nous serbiguet de crous!
 Quand maistre Perigord crént per sa cliantèlo,
 Et del grand home bey déjà palli l'estèlo,
 Per se maynachéja del poude las fabous,
 Coumo lou biel Judas, bénd soun Diou malhérou!...
 Aro per l'Angleterro,
 An lous secrech d'estat, bou li fa leou la guerro;
 Mais de sa trahisou
 Enfin nostro pouliço
 (Qu'abio prou de maliço)

Descoubris lou pouysou.
 L'Empéreur arritat, dabant sa cour lou mando,
 Et coumo li fasio may qu'uno réprimando,
 Talleyrand sousten tout, sans jamay se troupla,
 Ambé adresso riposto à ço que parey cla;
 Et, quand per lou counfoundre y mostro sa pancarto,
 Ambé sang frech la prénd, légis, et bou l'escarto,
 Soustenguen mordicus ambé tout soun toupet,
 Qu'aquel escrich es faous....! Adoun per un soufflet,
 Napouléoun flétris l'affrontado insoulenço
 Que bol lou rébési;
 Mais ambé soun esprit nostro adrecho echélenço,
 Sans ges se tracassa,
 Ambé uno noplo aysenço,
 Lou rand à soun bési:
 — Pas ges de préférenço,
 Soudis fasès passa;
 Y a pas d'impertinenço,
 Acos l'ordre del jour!...
 Fasès, fasès passa toujour.
 Proufitant de l'emboul quand cadun se souffletto,
 Gillo de per aquis; sans tambour ni troumpetto,
 Hérous! lou malcarat!
 De s'en estré tirat
 Ambé sa fardo netto.

FALET ET BULOT.

OU

LOU PARIT DE DOUS MAYNACHERS.

Cadun banto ço siou: sogué à tort, à rasou,
 Cadun es atal fach, acos dins sa naturo,
 La lengo d'unos fes taillo coum'un rasou;
 Mais d'aquéles bercach: escoutas l'abanturo:
 Dous bésis maynachers, qu'èrou en trin de babil,
 Ne débanèrou tant qu'agèrou de guirguil;
 L'un disio: moun Falet, may pagué pas de mino,
 Es habillé à tout fayre et soulide d'esquino;
 Quand lou monti, jamaï s'abiso d'un faou pas;
 A l'arayré, al brancart, rés lou rébuto pas;
 Ne soy may que countent, dins aqueste bilaché
 S'en troubario pas un de millou, per soun àché.
 L'aoutre abucelat del siou qu'èro un chabal de prix,
 L'escouto per piétat, ne fa pas qu'un mespris,
 Et de boun cor, joust capo, espoufino de riré;
 Per se galamina, coumenço de li diré:
 Saïque tu bourrios pas coumpara moun Bulot
 Ambé toun biel roussi, tout pialut et palot?...
 Ayço serio noubel, et per un estafetto,
 Ou mandarian, sul cop, mettre dins la gazetto.
 — Per que pas, li respond, lou bési pessugat
 Ço que costo d'argent, es de fes trop pagat;
 T'ou pourrio leou prouba, m'ay agés fosse mourré...
 Èt per acos, ségu, cario pas gayré courré!...

— Moun Falet, tout biel qu'ès, sans se fayré coucha,
Crébara toun Bulot, te lou fara lacha,
Sogué per lou fourcat, an lou double, en carretto,
Per tira may de pès, aque que lon lou metto.
— Te gagi cent escuch, et moun chabal en sus,
Se lou tiou, dis lou fat, y ajo un cop lou dessus.
Anan mounta lou pech amb' un biaché de peyros
Que despassara pas lou miech de las télleyros,
Et lou que sans couta, sera pus leou al bout,
Sans plus, floura gagnat. — Ah! pey qu'acos lou tout,
Accepti lou parit, me coubidos en noço,
Se beyra, per lou cop, lou qués baillent ou rosso,
Li fa lou del Falet. Sans se may quaréla,
Boou querré lous chabals per lous bite attala.

Lou bilacbé es en l'air, un cadun se préparo,
Ambe un ful de papier, de béni, garo, garo,
Coustata, tout riguént, per un proucès-verbal
La sargo que fara l'un ou l'aoutre chabal.
A tant d'empresamént qu'ayci se manifesto,
Dirias que de l'endrech es lou jour de la festo;
La juynesso s'arambo, et biels et maridach
S'alignou sus tourals coum' un réng de souldach,
Cadun se bol méla de tout ço que se passo;
L'un ten per lou Falet, l'aoutre bou l'escridasso,
Acos es un fourfoul, un baral, un débat,
Coumo se s'agissio de fayre un députat.
Noun estounen pas trop, car dédins lou campestré,
La forço del bestial que ne fa lou Bén-estré,
Intéresso bel cop, et n'es pas sans rasou:
Layssen-lous dounc joui cadun à sa fayçou.

Mais déjà lous carrioch an sas cargos de peyro,
Sou prestés à parti: Bulot, chabal de fieyro,
Brillabo de pertout de rouché enribantat,
Pel lusént, tresso facho et coucardo al coustat.
Per lou paoure Falet, an sa testo bourrudo
Soun harnés pétassat et sa couo ramudo,
Semblabo lou barlet d'aquel miol tant coussut,
Mais leou li monstrara s'és garrel ou boussut.

Lou cami, çapendant, d'uno rudo mountado,
A part qu'èro limpous de quaouco gingoulado
Qu'abio fach ragoula l'aygo loun des tourals,
Ero garnit pertout de fangousés carrals
Que de moussu Bulot salliroou las sabatos.

Partissou, sou partich; et de las quatre pattos
Lou Falet se li fa, bous archetto ben tant,
Que leou del finfarlen ben gagna lou dabant,
Lou maistre de Bulot qu'aquis arpatéjabo,
De beyre agi Falet, soulidomént biscabo,
— Ahi! Bulot, ahi! te layssés pas passa!
Li crido, mais lou miol coumenço de guelsa;
L'excito may d'un cop, de la ma lou caresso,
Mais a bel lou flatta, toujours même pigresso,
Bulot semblo poussif fa pas que de saluch
Qu'accompagno en rounflant ambé sous estournuch,
Soun mestre espaourugat, quand bey la malparado,
Lou flagello de coch; pey, uno réculado

Que bol trop follomént li fayré exécuta,
 Fa que carriot et miol tout se ben empasta.
 Nostre brillant Bulot qu'a gestat sa liouréo,
 De fango tout passit, es aqui la riséo,
 Pendent que lou Falet, qu'escalo coum' un cat,
 Ben atteigné lou pech, sans abeyré coutat.
 Es adoun sus Bulot que se tiro de bouètos!...
 Lardous et camouflech y tombou sus las guettos,
 Sans pourré se facha, pey qu'y coumprénd pas rés;
 Mais un aoutre per el entend ço qu'aousirés.
 — Qu'és debengut Bulot, la flou de la coumuno?
 Fa sa paouso, dins un, et ne feray may d'uno.

— Coussi, l'aoutre respond, nostre fringant cha-cha,
 Lou biel Falet, de bou, l'aourio-ti fa lacha?...
 — May qu'acos, dis un biel, encantat de l'affayré,
 A gagnat cent escuch ambé soun saoupréfayré,
 Amay aoura Bulot, soun tant bel coumpagnou,
 Per estré cado jour témouen de sa balou.

Lou maistre de Bulot que tout ayços abalo
 Counfus de soun parit, quand soun bési dabalo
 Se sarro d'el, li dis d'un toun estoumagat,
 Ne débi coumbéni, moun miol est trop pagat!...
 Qual aourio dich, pourtant, que ta bieillo trigosso...
 — Boun chabal, li respond, baoujas, n'es jamay rosso;
 Apprénd aco de yeou, surtout paouré coutral,
 Mé bantés pas un miol sans lou beyre al trabal;
 Ou besés per lou tiou, qu'ambe sa taillo fino,
 Bal pas moun biel roussi que pago pas de mino
 Quand ne caousiras un, abant de t'en carga,
 Assajo ço que bal, per lou pas trop paga.

LOU TROUMPÉTAYRÉ ET LOU MARCHAND DE BI.

Un troumpétayré, on sap, se lèbo boun mati,
 Per crida de peys fresq; pus soubent per menti;
 Mais acos pas soun fait, es lou de la persouno
 Que li fa la cansou: tant pis se n'es pas bouno;
 Innoucent, se boulès, ou per nostres pécach,
 Nous fa pas mens courri; ray, se sèn pas dupach!
 Qual pourrio s'en flatta?... Quand la ruso s'en mêlo,
 Lous us mens, d'autres may, nous cal layssa de tèlo;
 Mais lou tort qu'on se fa resto pas impunit:
 Dious réserbo à cadun soun tal de pa bénit.

Tout aqeste prépaous n'es qu'un pichot à compté,
 Que bous baylé en passant, ne benguén à moun conté;
 Car per lou pla fini, lou cal pla coummeça:
 Menchan, escoutas-lou, béni de lou pensa.

Un brabé paysan, que jamay batéjabo
 Lou bi que Dious a fach, toujours lou détaillabo,
 Sans lou fa troumpeta, sans mettre lou ramel,
 Et tout l'ay courrissio, coumo acos naturel,
 Quand s'en bénd de pla bou; tabé flascous, cabettos,

Barrals et barricoch, tout, coumo de nabettos,
 Fasioou lou bay, lou ben, tout s'y bénio cabi,
 Lou troumpetto abio bel troumpetta d'aoutré bi,
 Ero de tens perduto, dégus noun se sarrabo
 Daous lous marchands de bi per lous quals troumpétabo,
 Réçapio de lardous qu'èrou pas méritach,
 Et lou paoure el, pécaire! ambe sous poch couflach,
 Buffabo de pus fort, per attira pratiquo;
 Mais abio bel buffa, y èro per sa musiquo.
 Las de passa per sot, s'en ba, roundalèjant,
 Cerca per lous quartiers lou trop hérous marchand,
 Que li pourtabo cop, an tant et tant de preysso.
 A forço de cerca l'homé de dono Jeysso,
 Qu'abio aousit mensouna, ben dins un recantou,
 Que y èro incounescut, mais que cado pintou
 Abio leou dessoutat, pey qu'an sas cansounettos,
 Sous réfrins à Bachus, y escoulabou burettos.
 Aqui, sus un biel banc, loung et mal escayrat,
 Cado piquo-la-set, an soun beyre affrayrat,
 Fasio débotoment ço qu'appélan saoussolos,
 Pey, per lou recaouca, sas mas sou pas gés folos,
 Y escoulou, sans fayçous, las pintos, lous pégals,
 Et s'ajugou lou set an de cébos et d'als.
 Las cébos foou canta: n'es pas 'stounant qu'oun gnaché.
 — — Anen, bengo de bi! Que la canèlo raché!
 Cridou toutes al cop, — et dégus d'oublida
 Qu'à l'hounou de Jeysso nous cal toutes banda!...
 Es de boun cor, adoun, qu'entounou sas louanjos,
 Et Dious sap se lou bruch destorbo pas las anjos!...
 Quitto lou cabaret, bésito lou céliè:
 Aqui nostre marchand, sas fillos, sa mouillé,
 Tout èro en moubémént, tout s'affrayro, se presso
 Per téné de baylat lou bi que toujours bessou:
 Cado ibrougno se bat, per estré des premiers,
 Et may d'un flascou plé truco loung des taouliers.
 Enfin ben lou moument que del mounde la foulo;
 Proubésido de bi, s'esclarcis et s'escoulo.
 Lou troumpetto, aladoun, d'un air tout estounat;
 Dis an aquel marchand: bé! n'abès mesurat!...
 Se pot pas! sès nascut sans faouto an la grespino?...
 Et de li rire al nas, pey bou lou turlupino,
 En diguen, à soun tour: las de bostre troua,
 Benès beyre se y a quicommet à gratta?...
 Dins la bilo, pourtant, manquo pas de bandieyros?...
 Es dounc per benta d'air quc flottou per carreyros?...

Lou paoure estabourdit d'aquel sot coumplimént,
 Gaousou pas dire un mot, es trouplat sul moument;
 Per pas demoura court s'hasardo de li fayre:
 Coussi poudès tant pla réussi bostre affayré,
 Sans pencha lou peillot, sans fayre caramel?
 A boun bi, li respond, cal pas cap de ramel.
 Lou troumpétayre mut an aquélo répliquo,
 Se gratto lou coupet, lou planto aqui de piquo.
 Yeou que n'ay pas pus rés à bous fayré balé,
 Resti mut, à moun tour, per tourna préné halé.

LA NAYSSENÇO DEL JOUR.

(31 juillel 1854.)

Moun Diou! qu'acos bélas! qu'acos a moun amour
De beyre paouc-à-paouc, nayssé, creyssé lou jour!...
Tout es encaro siaou; mais déjà las estèlos
Pallissou, s'atudant, coumo aoutant de candèlos
Dout lou blézé finis sul bord del candalier;
Tal qu'un dous souléllé, lou lugar matinier
Esclayro soul l'azur de sa lampo daourado,
Et la timido aoubeto an de sati parado,
Saludo l'astre-rey que nous dono lou jour;
Mais nostro bergougnouso en li faguen sa cour,
Se coubris d'un afar que la rand may que bèlo;
Adoun ben brésilla la bésiado hiroundèlo.

Qu'a déjà prébengut, an soun caracaca,
Lou galliou tant facile à se desaruca.
Lou jour se ranfourtis, rébeillant la marmaillo
De milo passérach de teoulat, de muraillo
Que tirou del cabés touto gen de mestier;
Lou maréchal surtout qu'ensourdo soun quartier.
Mais faguen un retour daous la cèlesto plano
Qu'englaouzis nostres els, quand paouc-à-paouc débano
Lou catel de coulous que sap tant mirgailla
Per fa creysce lou jour que ben esparpailla:
De l'azur que pallis sus passés de nostr' aoubo,
Qu'aymi lou tendre berd dout nuanço sa raoubo!...
Pey de sous bels ribans las tant bèlos coulous!...
Que l'airé es pur adoun embaoumat de las flous!...
Me semblo respira l'haléno de las anjos!
Lou cant des aousèlous me f' aousi sas louanjous,
Dins l'accord que partis d'un bouscaché fresquet,
Ount s'assemblou, dirias, per quaouque saint moutet:
Tout flatto lou bistou, rebiscoulo, transporto!...
Crézès del Paradis entrebeyre la porto,
Tant aquel spectacle a lou doun de charma:
Déjà lou soun claret d'uno santo campano
Fa que cado chrestia, tout se lebant, s'affano
A fayre soun salut à la mayre de Diou:
Ave, Maria, disèn toutes lous que sèn biou;
Ave, Maria, surtout dins lou tens que sèn aro
Ount lou tarriplé fléou tourna may se déclaro!...
Biergés, soulaja-nous
Qu'abén récours à bous.
A bous dout lou poudé de tout mal nous apparro!...
Moun cor dégloufo-te, prend-z-ou coum' à préfach,
Glourifio toun Diou, dins soun pus grand benfach,
De t'abeyré dounat, amb'uno amo immourtalo,
L'espouer de beyre un jour sa facio talo qualo,
Et d'admira, sans fi, las grandos perfectious
Que de toutes lous sants foou las admiratious.
Tout nous semblo imbita, quand lou jour nous esclayro,
A béni lou boun Diou: las flous que lou nas flayro,
Lou cant des aoussèlous, las bapous del mati
Que montou daous lou ciel, tout nous semblo aberti
Qu'és adoun lou moument, an touto la naturo,
De lou glourifia; mais s'amb' uno amo puro
Sabèn nous attira sa santo proutectiou

Jouiren ençabal de sa bénédiction.
Amen.

MAISTRE SIAOU,

ou

Soubéni de la flou qu'aquel paouré me dounet
quand èri encaro pla joubénet.

(27 septembre 1854.)

M'ou recordi tout cop, ou-z-oublidi pas gairé,
Quand èri joubénet, abio 'no brabo mairé,
Pléno de religiou, entendént lou gouber
De l'oustal, des efans, anfin tout soun deber.
Per douna boun echemple à lous qu'abioou mens d'aché,
Coumo lou pus grandet me bourguet lou pus saché;
De boun' houro, tabé, per fayre aoutouritat,
Me faguet l'aoumounier de nostro caritat.
Toueneto (acos es yeou que tout aycos regardo)
As paoures del boun Dious, del panet, de la liardo,
Pourtabo de boun cor lou deoumé qu'y rebént;
Et lous deshéritach lou bénissioou soubént:
Un li fasio: — Pichou, Dious te cresco en sapienço,
L'aoutré, aymo lous paourech, sogos sa proubidenço ;
Tout lou mané de l'an, aqui, coumo à préfach,
Cadun fasio sous souhaich per nostros caritach;
Et moun cor me disio: boutas, n'agés pas lagui,
Y faray lou per que, per tant paouc que yeou n'agui;
Per lous assécouri plandray pas cap d'effort....
Se jamay lous escuch de quaouque coffre-fort
Béno me segounda dins de talos despensos,
Adoun soulajaray toutos las indigenços,
Moun Dious! qu'aourio plasé de lous escampilla
Per paycé lous paourech, per lous despézouilla!...
Es quicon de tant dous de fayre de largessos!...
Assajas-ou, richards, et sus mas approumessos,
Jouirés d'un bounhur qu'abès jamay sentit
Dins cap d'aoutré plasé; toutes bous oou mentit,
Car boun es rebengut que degoust, que misèro,
Que regrech escousens que sou bostro galèro:
Soubénès-bous, d'aillurs, que s'abès de grands bés,
Es per ne fayre part à lous que n'ou pas rés,
Al frayre malhérous qu'és dedins la souffrenço,
Et noun pas boun serbi per la folo despenso
Que bous méno soubent à bostro perdition,
Sans que boun abisés, pey que debént passiou.
Mais de moun soubéni reprenghen la nayssenço:
Maistre Siaou, cado jour, ambé soun bastounet,
Bénio capo à l'oustal, aquis en moutounet
Qu'és ségu d'y trouba, tal que dédins un pargué
La pasturo qu'y cal per tant caro que bargué.
Ero tant biel, tant biel, nostre paouret hountous,
Que bababo sus el et bagnabo sa fardo,
Tal que lou maynachou qu'uno filletto gardo,

— Quand per mettré sas dents rousigo sous détous
 (Coum' un counfrayré dis, an soun esprit que lardo).
 May diguesso en tremblant soun piétadous pater,
 La caro d'aquel biel n'èro pas mens risento;
 Et mêmés de l'hiber
 La sasou tant cousento.
 Y empajabo jamay de béni m'attrapa
 Per réçaoupre de yéou soun cantélet de pa.
 Mais un jour maistre Siaou (pourrio pas dire couro)
 Un jour que sentiguet sayqué beni soun houro,
 Abant de me quitta per lou saint Paradis,
 Me dounet uno flou que sus moun cor se flouro;
 Et que despey me dis,
 Quand tout cop s'expandis,
 Fossos caousos mouralos
 A pus près talos qualos
 Que las que Maistre Siaou se pensabo beléou.
 La flou 'n francés s'appèlo uno bolo de néou;
 Per sa formo sans doute, adoun que tombo en balos;
 Mais ne pouden tira quaouquos coumparasous
 Que lou suchet fa nayssé: ayci dounc mas rasous:
 Qual sap se Maistre Siaou que me debio fa blanco,
 Boulio pas dire: un jour, tus qu'as lou pel négrous,
 Coumo yeou sus toun cap aouras courouno blanco?...
 Plait à Diou, Maistre Siaou, que toun souhait sogue hérou!

Déjà moun el se tanco,
 Et ma sabo s'estanco
 Tal que lou fruit madu.... garo! s'es berménous....
 Mais prégui Nostro-Damo
 Que m'a tant proutéjat,
 De me saouba moun amo
 Pas que per caritat,
 Per tant paouc qu'ençabal yeou me sogue ajudat.

© CIEL d'Oc – Mai 2006